

Morning Regional Dogri News Bulletin, 23 July. 2025

मार्निंग डोगरी न्यूज़ बुलेटिन

समं. 09.20 Hrs

Headlines

1. प्रधानमंत्री नरेन्द्र मोदी होर अज्जै थमां ब्रिटेन ते मालदीव दी चार दिनें दी सरकारी जात्तरा पर रवाना होडन।
2. लेफ्टिनेंट गवर्नर मनोज सिन्हा होरें नुनवन ते चंदनवाड़ी आधार शिविरें दा दौरा लाइयै सभनें सरबंधत धड़े दे जतनें दी सराहना कीती ते आखेआ जे श्री अमरनाथ श्रद्धालुएं दी गिनतरी 3 लक्ख 35 ज्हार दे आंकड़े गी पार करना, सैलसफा लेई इक खरा मता बढ़ावा ऐ।
3. केन्द्र सरकारै समग्र शिक्षा ते पी-श्री दे तैह्त जम्मू-कश्मीर लेई शिक्षा दे खेत्तर आस्तै 1 ज्हार 6 सौ नानवे करोड़ रपे जारी कीते न।
4. जंगलात मंत्री जावेद राणा होरें बन्ने आहले जिले पुंछ च बिजली दी बंडु सरबंधी योजना दा जायजा लैता।
5. मौसम विभाग नै औंदी 25 तरीक तोहड़ी जम्मू संभाग च भारी बरखें दा अलर्ट जारी कीता ऐ। खराब मौसम करी रियासी ते रजौरी जिलें च अज्ज स्कूलें गी बंद रक्खेआ गोदा ऐ। हून खबरें दी तफसील कन्नै विजय बजाज।

<><><><><><>

PM

प्रधानमंत्री नरेन्द्र मोदी अज्ज यूनाइटेड किंगडम ते मालदीव दी च'ऊं दिनें दी आधिकारिक जात्तरा पर रवाना होडन। पैहले चरण च प्रधानमंत्री होर द'ऊं दिनें दी जात्तरा पर यू.के जाडन। नमी दिल्ली च मीडिया गी जानकारी दिंदे होई विदेश सचिव विक्रम मिसरी होरें आखेआ जे नरेन्द्र मोदी अपने समकक्ष कीर स्टारमर ते किंग चार्ल्स कन्नै गल्लबात करडन। अपने द'ऊं मुल्ले दे दौरे दे दुए चरण च प्रधानमंत्री होर द'ऊं दिनें दे दौरे लेई शुक्रवारें मालदीव जाडन जित्ये शनिवारें मालदीव दी आजादी दी 60मीं ब'रेगंड दे जश्र च ओहू मुख परौहने दे तौरा पर हिस्सा लैडन।

<><><><><><>

LG-Amarnath

लेफ्टिनेंट गवर्नर मनोज सिन्हा होरें कल नुनवन ते चंदनवाड़ी आधार शिविरें दा दौरा लाइयै उत्ये श्रद्धालुएं, सेवा उपलब्ध करोआने आहलें ते सरबंधत अधिकारिणें कन्नै गल्लबात कीती। इस मौके पर उ'नें श्रद्धालुएं लेई उपलब्ध सेवाएं-सुविधाएं दी समीक्षा कीती ते आखेआ जे सरबंधत अधिकारिणें, सेवां उपलब्ध करोआने आहलें ते जात्तरा कन्नै जुड़े दे होरनें लोकें दे जज्वे ते वचनबद्धता दी बढौलत गै बाबा बर्फानी दे श्रद्धालुएं लेई इक यादगार अनुभव जकीनी बनी सकेआ ऐ। ध्यानजोग ऐ जे इस ब'रे अजें तोहड़ी 3 लक्ख 35 ज्हार शा मते श्रद्धालुएं श्री अमरनाथ जी दी गुफा च शिवें दे हिमलिंगम रूप दे दर्शन करी लैते दे न। तोआई जम्मू दे भगवती नगर जात्तरी निवास थमां अज्ज बडुलै सख्त सुरक्षा बंदोबस्तें हेठ 2 ज्हार 837 अमरनाथ श्रद्धालुएं दा 21मां जत्था कश्मीर घाटी लेई रवाना होआ। लौहकी-बडुई कुल 118 गड्डिणें दे काफिले च रवाना होए दे इस जत्थे च 2 ज्हार 286 मर्द, 461 महिलां, 8 बच्चे, 80 साधु ते 2 साध्वियां शामिल न। इंदे चा 1 ज्हार 36 श्रद्धालु बालटाल लेई जिसलै के 1 ज्हार 801 श्रद्धालु पहलगाम आधार शिविर लेई रवाना होए दे न जित्युआं कल ओहू अपनी अगड़ी जात्तरा शुरु करडन। इस मौके पर श्रद्धालुएं च बडा मता उत्साह दिक्खने गी लब्भा।

<><><><><><>

Food-Safety-Ramban

खाद्य सुरक्षा विभाग रामबन नै श्री अमरनाथ श्रद्धालुएं दी खरी सेहत ते सुरक्षा जकीनी बनाने लेई बनिहाल ते रामबन च लंगर आहली थाहें दा व्यापक निरीक्षण कीता। इस मौके पर लंगर सेवादारें गी सलाहू दित्ती गेई जे ओहू तैयार कीती जा'रदी खाने-पीने दिणें चीजें च तेल, लून ते खंडु दी मात्रा गी घट्ट करना। इस मौके पर लैते गेदे नमूने, तय मानकें दे मूजब गै पाए गे। एहदे अलावा स्वयंसेविणें लेई साफ-सफाई ते खाद्य सुरक्षा बारै जागरूकता सत्र बी लोआए गे ते कन्नै उ'नेंगी निर्देश दित्ते गे जे ओहू जात्तरा

दरान श्रद्धालुएं लेई ताजा, सुरक्षित ते सत्तदार खुराक जकीनी बनाना। इस सरबंधै च होर जानकारी सांझी करदे होई रामबन दे खाद्य सुरक्षा अधिकारी बलबीर सिंह होरें आखेआ

<><><><><><>

Centre-Education

केन्द्र सरकार नै 2023-24 ते 2024-25 बरें लेई समग्र शिक्षा ते पीएम श्री योजना दे तैहत जम्मू-कश्मीर गी 1 जहार 6 सौ नानवे करोड़ रपे दित्ते ना। केन्द्री शिक्षा मंत्री धर्मेन्द्र प्रधान होरें लोकसभा गी दस्सेआ जे जम्मू-कश्मीर गी समग्र शिक्षा दे तैहत 2023-24 बरें लेई 8 सौ 65 करोड़ 44 लक्ख रपे ते 2024-25 बरें लेई 8 सौ 23 करोड़ नुंजा लक्ख रपे दित्ते गे ना। एह्दे अलावा पीएम श्री योजना तैहत 2023-24 बरें लेई 52 करोड़ उनताली लक्ख रपे ते 2024-25 बरें लेई 99 करोड़ 72 लक्ख दित्ते गे ना। ऐकड़ी दौनें योजनाएं दा मकसद देसै च पढाई लखाई दे खेत्तर च बदलाव आहनना ऐ।

<><><><><><>

National-Broadcasting Day

अज्ज राष्ट्री प्रसारण दिवस ऐ। सन् 1927 च अज्जै द ध्याड़े दे देसै च पैहला रेडियो प्रसारण इंडियन ब्रॉडकास्टिंग कंपनी दे बाँम्बे स्टेशन थमां शुरू होआ हा। 8 जून, 1936 गी भारती राज्य प्रसारण सेवा दा नांऽ ऑल इंडिया रेडियो रक्खेआ गेआ। एहू ध्याड़ा भारत दे विकास, शैक्षिक प्रसार ते सांस्कृतिक संरक्षण च प्रसारण दी महत्वपूर्ण भूमिका गी दर्शादा ऐ। रेडियो प्रसारण नै भारत दे विकास च महत्वपूर्ण भूमिका निभाई ऐ। आजादी दी लड़ाई दे दरान, रेडियो, सूचना दे प्रसार ते एकता गी बढ़ावा देने दा शक्तिशाली साधन हा। रेडियो प्रसारण आजादी दे बाद खासतौर पर ग्रामीण इलाकें च साक्षरता, सेहत सरबन्धी जागरूकता ते कृषि ज्ञान गी बढ़ावा देने च बी मददगार रेया ऐ। 1927 थमां रेडियो, देशै च लोकें दे जीवन दा इक महत्वपूर्ण हिस्सा रेहा ऐ। आकाशवाणी असल च अपने आदर्श वाक्य -बहुजन हिताय, बहुजन सुखाय पर खरा उतरदे होई जनता गी सूचित ते शिक्षित करने सने उं'दा मनोरंजन करने च बी लगातार तत्पर ऐ।

<><><><><><>

Rana-RDDS

जंगलात, पर्यावरण ते जनजातीय मामलें दे मंत्री जावेद अहमद राणा होरें जम्मू दे सिविल सेक्टरेट च पुंछ जिले च नमें सिरेआ तैयार कीती गेदी बंड सरबन्धी योजना यानि (RDSS) गी लागू करने बारै तफसीली जानकारी हासल कीती। इस बैठक च बिजली बंड सरबन्धी बुनियादी ढांचे च प्रगति आहनने ते गुणवत्ता गी यकीनी बनाने लेई खासतौरा पर प्हाड़ी इलाकें ते हाड़ें आहले इलाकें उपपर खास ध्यान दित्ता गेआ। मंत्री होरें निर्देश दित्ता जे गुणवत्ता उपपर कोई बी समझौता नेई होना लोडचदा ते सब्भनें कम्में गी लैय कीते गेदे समें अंदर मुकम्मल कीता जाना चाहिदा। खम्बें, ट्रांसफार्मर ते सर्विस लाइनें गी गलत तरीकें कन्नै लाने सरबन्धी चैताएं बारै चर्चा कीती गेई ते इन्दे पर खास ध्यान देने बारै गलाया गेआ।

<><><><><><>

MLA Jammu West Rana

जम्मू पच्छिम थमां विधायक अरविंद गुप्ता होरें कल जम्मू आहले सिविल सैक्टेरिएट जाइयै जल शक्ति मंत्री जावेद अहमद राणा हुं'दे नै मलाटी कीती। इस दरान विधायक होरें अपने हलके च पानी दी सप्लाई कन्नै जुड़े दे महत्वपूर्ण मामलें मंत्री हुं'दे अग्गे रक्खे ते उं'नेंगी गुजारिश कीती जे लोकें दिएं समस्याएं दा समेबद्ध ढंगगै'नै नबेड़ा करोआया जा। मंत्री होरें सार्वजनिक हितै आहले मामलें पर लोकें दी प्रतिक्रिया दे महत्वै पर जोर दित्ता ते विधायक गुप्ता हुं'दे सुझाएं पर फौरी कार्रवाई दा जकीन दोआया।

<><><><><><>

Forest-Deptt. Ban

जम्मू-कश्मीर दे जंगलात मैहकमे नै भद्रवाह जंगलात डिविजन दे तैहत औने आहले सभनें जंगलात खेत्तरें च प्लास्टिक ते नान बायोडिग्रेडेबल वेस्ट यानि नेहियां चीजां जेहिडियां गलदियां-सड़दियां नै, हैन उनेंगी जंगलें च लेइये जाने, कूड़ा इद्दर-उद्दर सुट्'अने, कूड़ा इक थाहरा पर किट्टा करने जां फूकने उपपर सख्त रोक लाई ऐ। जेड़े इयां करदे न, उनें अपराधियें गी 50 जहार रपें तगर दा जुर्माना जां इक म्हीने तगर दी सजा होई सकदी ऐ। इस गैंऽ दा मकसद इस खेत्तर गी समृद्ध जैविक बन्न-सबन्नता ते

चपासम दी रक्षा करना ऐ जेडा मनुक्ख आसेआ फैलाए गेदे प्रदूषण दे कारण खतरे च ऐ। होर जानकारी भद्रवाह दे डिविजनल फारेस्ट अधिकारी दविंद्र कुमार हुं'दे कोला।

<><><><><><>

Weather

ते हून खबर मौसम दी। मौसम विभाग नै औंदी 25 जुलाई तोहड़ी जम्मू संभाग दिएं बक्ख-बक्ख थाहें पर भारी थमां बड़ी भारी बरखा दी चेतावनी जारी कीती ऐ। इस दरान मौलेधार बरखा बरने, गरज-चमक कन्नै बरखा पौने ते अंधी-झक्खड़ झुल्लने दे असार ना। मौसम विभाग नै भारी बरखा करी चानचक्क हाड़ औने ते ल्हास-पस्सियां पौने दी शँका जाह्न करदे होई लोकें गी सलाह दिती ऐ जे ओहू नदिएं-नालें थमां दूर रौहन। तोआई मौसम दे खराब सूरते-हाल करी, अज्ज जम्मू संभाग दे रियासी ते रजौरी जिलें च एहतियात दे तौर पर सब्भनें सरकारी ते निजी स्कूलें गी बंद रक्खेआ गेदा ऐ।

<><><><><><>